

**PROGRAM RADA**

**DOMA NARODA PARLAMENTA FEDERACIJE BOSNE I  
HERCEGOVINE ZA 2017. GODINU**

Na osnovu člana 83. stav 2. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03 i 21/09), Dom naroda Parlamenta Federacije Bosne i Hercegovine je, na 13. vanrednoj sjednici održanoj 21.9.2017. godine, usvojio

## **PROGRAM RADA**

### **DOMA NARODA PARLAMENTA FEDERACIJE BOSNE I HERCEGOVINE ZA 2017. GODINU**

Program rada sadrži zadatke Doma naroda koji proizilaze iz Ustava Federacije Bosne i Hercegovine, zakona, planskih dokumenata Federacije Bosne i Hercegovine, kao i druge poslove i zadatke u rješavanju pitanja od interesa za Federaciju Bosne i Hercegovine. Program rada čine pitanja iz djelokruga rada Doma naroda koja će se razmatrati na sjednicama Doma naroda. Programom rada utvrđuju se poslovi i zadaci Doma naroda, njihov osnovni sadržaj i način izvršenja. Radna tijela Doma naroda pri utvrđivanju svojih obaveza i zadataka pridržavaju se Programa rada Doma naroda.

Dom naroda vršit će svoju zakonodavnu funkciju u skladu sa Ustavom Federacije Bosne i Hercegovine kao osnovnim pravnim i političkim aktom u Federaciji Bosne i Hercegovine i zakonima radi osiguranja razvoja Federacije Bosne i Hercegovine.

Program sadrži zakonodavne i analitičko-informativne aktivnosti Doma naroda. Ovaj program usklađen je sa Programom rada Vlade Federacije Bosne i Hercegovine za 2017. godinu u kojem su definirani strateški ciljevi Vlade Federacije Bosne i Hercegovine, a koji su usmjereni u pravcu daljnjeg usklađivanja domaćeg zakonodavstva sa zakonodavstvom EU, očuvanja makroekonomske stabilnosti i jačanja budžetske odgovornosti, ekonomskih reformi, izgradnje i rekonstrukcije transportne, energetske i okolišne infrastrukture, nastavka reformi pravosuđa i javne uprave, zdravstva i socijalnog sektora, borbe protiv korupcije i organiziranog kriminala, jačanja saradnje sa organizacijama civilnog društva, te jačanja regionalne saradnje i koordinacije među kantonima.

U cilju efikasnije realizacije Programa rada u 2017. godini, Dom naroda poticat će saradnju sa Vladom Federacije Bosne i Hercegovine, Predstavničkim domom Parlamenta Federacije Bosne i Hercegovine, predsjednikom i potpredsjednicima Federacije Bosne i Hercegovine, kantonalnim skupštinama, Parlamentarnom skupštinom Bosne i Hercegovine, a prema potrebi i zakonodavnim tijelima Republike Srpske i Brčko Distrikta.

Program rada Doma naroda za 2017. godinu je planski dokument za 2017. godinu koji ostaje otvoren za sve opravdane dopune u skladu sa aktuelnom situacijom u Federaciji Bosne i Hercegovine.

Dom naroda će, prema potrebi, razmatrati ostvarivanje Programa rada za 2017. godinu, te poduzimati odgovarajuće mjere za njegovo izvršenje.

Osnovni ciljevi rada Doma naroda u 2017. godini bit će usmjereni na:

- reforme društveno-ekonomskog sektora u nadležnosti Federacije Bosne i Hercegovine,
- reforme u radnom i socijalnom sektoru, zdravstvenom sektoru, sektoru pravosuđa i javne uprave,
- jačanje društvene pravednosti i stabilnosti Federacije Bosne i Hercegovine sa posebnim osvrtom na jačanje demokratskih odnosa i vladavine prava,
- iniciranje i provođenje reformi iz usvojene reformske agende usklađenih sa potrebama Federacije Bosne i Hercegovine na putu evroatlanskih integracija, usklađivanje domaćeg zakonodavstva sa zakonodavstvom EU, te unapređivanje zakonodavnih procesa,
- jačanje saradnje sa kantonalnim skupštinama,
- kontinuiranu saradnju sa međunarodnim partnerima,
- reformu i reorganizaciju unutrašnjeg uređenja Stručne službe Doma naroda i Zajedničke službe Parlamenta Federacije Bosne i Hercegovine.

Program rada Doma naroda za 2017. godinu sadrži tačke koje će biti smjernice za rad na sljedeći način:

1. Ustav Federacije Bosne i Hercegovine:
  - potvrđivanje amandmana na Ustav Federacije Bosne i Hercegovine, koje je donio visoki predstavnik za Bosnu i Hercegovinu,
  - razmatranje prijedloga amandmana na Ustav Federacije Bosne i Hercegovine, koje je predložio Klub delegata hrvatskog naroda u Domu naroda Parlamenta Federacije Bosne i Hercegovine i Vlada Federacije Bosne i Hercegovine,
  - poduzimanje dostupnih aktivnosti za provedbu člana IV.A.2.6. Ustava Federacije Bosne i Hercegovine, koji je izmijenjen Amandmanom XXXIII. na Ustav Federacije Bosne i Hercegovine, a koji se odnosi na izbor nedostajućih delegata srpskog naroda u Domu naroda Parlamenta Federacije Bosne i Hercegovine,
  - razmatranje inicijativa za promjenu Ustava Federacije Bosne i Hercegovine dostavljenih u parlamentarnu proceduru;
2. Dom naroda u toku 2017. godine razmotrit će zakone i druge akte utvrđene Planom normativnih aktivnosti Vlade Federacije Bosne i Hercegovine za 2017. godinu;
3. Dom naroda u toku 2017. godine razmatrat će zakone i druge akte ovlaštenih predlagača;
4. Dom naroda u toku 2017. održat će tematske sjednice iz oblasti energetike i poljoprivrede. Također, prema potrebi, analizirat će se i ostala aktuelna ekonomska i društvena pitanja u Federaciji Bosne i Hercegovine radi ostvarivanja povoljnijeg pravnog, ekonomskog, socijalnog i političkog okruženja;
5. Dom naroda u toku 2017. godine pristupit će izmjenama i dopunama Poslovnika o radu;
6. Dom naroda u toku 2017. godine pristupit će izmjenama i dopunama svih akata kojima su uređena pitanja unutrašnjeg uređenja Stručne službe Doma naroda i

Zajedničke službe Parlamenta Federacije Bosne i Hercegovine radi ostvarivanja efikasnijeg i profesionalnijeg rada službi;

7. Dom naroda nastaviti će kontinuiranu saradnju sa kantonalnim skupštinama putem održavanja redovnih radnih sastanaka sa rukovodstvima;
8. Dom naroda nastaviti će održavati regionalnu međuparlamentarnu saradnju, kao i potpunu otvorenost i transparentnost djelovanja i koordinaciju u vezi sa inicijativama Saveza općina i gradova Federacije Bosne i Hercegovine, nevladinog sektora i građana.
9. Održavanje tematskih sjednica klubova delegata iz reda konstitutivnih naroda u Domu naroda;
10. Dom naroda nastaviti će održavati saradnju sa međunarodnim partnerima i delegacijom EU u Bosni i Hercegovini putem Twinning projekta i drugih projekata koji će osnažiti i unaprijediti zakonodavne procese u Parlamentu Federacije Bosne i Hercegovine.

#### **A. ZAKONODAVNA DJELATNOST**

- Dom naroda će u 2017. godini razmatrati nacрте i prijedloge zakona koje Vlada Federacije Bosne i Hercegovine uputi u parlamentarnu proceduru, a u skladu sa Programom rada Vlade Federacije Bosne i Hercegovine za 2017. godinu.
- Razmatrat će se prijedlozi pristigli od predsjednika i potpredsjednika Federacije Bosne i Hercegovine, komisija i odbora Doma naroda, kantonalnih skupština, gradskih i općinskih vijeća.
- Svi prijedlozi zakona bit će razmatrani kada stignu u parlamentarnu proceduru u skladu sa Poslovníkom i mogućnostima pravovremenog koordiniranja svih aktivnosti Kolegija vezano uz pripremu sjednica i pokretanje određenih pitanja za raspravu na klubovima delegata konstitutivnih naroda u Domu naroda, komisijama i odborima Doma naroda.

#### **B. ANALITIČKO-INFORMATIVNA DJELATNOST**

- Dom naroda kao svoju značajnu aktivnost u 2017. godini posvetit će razmatranju analitičko-informativnih materijala za koje je predviđeno da ih dostavi Vlada Federacije Bosne i Hercegovine ili takvih materijala koji su od posebne aktuelnosti, a koje predlože za razmatranje predsjednik sa potpredsjednicima Federacije Bosne i Hercegovine, te pojedinačno delegati u Domu naroda ili radna tijela Doma naroda.

#### **C. IZVJEŠTAJI O RADU**

- Dom naroda će u 2017. godini razmatrati sve izvještaje o radu koji su u nadležnosti Parlamenta Federacije Bosne i Hercegovine, a koje prethodno predloži Vlada Federacije Bosne i Hercegovine i koje je predložila u svom operativnom planu, te će

razmatrati izvještaje o radu koje tijela i institucije u Federaciji Bosne i Hercegovine direktno podnose Parlamentu Federacije Bosne i Hercegovine.

DN broj: 02-02-1278/17  
21. septembra 2017. godine  
Sarajevo

**PREDSJEDAVAJUĆA  
DOMA NARODA  
PARLAMENTA FEDERACIJE BIH**

